



МОНГОЛ УЛСЫН БОЛОВСРОЛЫН  
САЙДЫН ТУШААЛ

2024 оны 12 сарын 19 өдөр

Дугаар А/260

Улаанбаатар хот

Журам шинэчлэн батлах тухай

Монгол Улсын Засгийн газрын тухай хуулийн 24 дүгээр зүйлийн 2 дахь хэсэг, Боловсролын ерөнхий хуулийн 43 дугаар зүйлийн 43.7 дахь хэсгийг тус тус үндэслэн ТУШААХ нь:

1. "Боловсролын цахим мэдээллийн сан бүрдүүлэх, ажиллуулах журам"-ыг хавсралтаар шинэчлэн баталсугай

2. Журмын хэрэгжилтийг удирдлагаар хангаж ажиллахыг Цахим боловсролын газар /Г.Бат-Эрдэнэ/-т, хэрэгжилтийг хангаж ажиллахыг Боловсролын ерөнхий газар /Г.Ням-Очир/, Боловсролын мэдээллийн технологийн төв (Л.Энхбат)-д тус тус даалгасугай.

3. Журмын хэрэгжилтэд 2 жил тутам хяналт-шинжилгээ, үнэлгээ хийж дүнг танилцуулахыг Хяналт-шинжилгээ, үнэлгээ, дотоод аудитын газар /Н.Нарангэрэл/-т даалгасугай.

4. Энэхүү тушаалыг баталсантай холбогдуулан Боловсролын сайдын 2024 оны "Журам шинэчлэн батлах тухай" А/187 дугаар тушаалыг хүчингүй болсонд тооцсугай.

САЙД

П.НАРАНБЯЯР



14241 0804

Боловсролын сайдын 2024 оны  
12-р сарын 19-ны өдрийн  
А/210 дугаар тушаалын хавсралт

ATA12937 911612

## БОЛОВСРОЛЫН ЦАХИМ МЭДЭЭЛЛИЙН САН БҮРДҮҮЛЭХ, АЖИЛЛУУЛАХ ЖУРАМ

### НЭГ. НИЙТЛЭГ ҮНДЭСЛЭЛ

1.1. Энэхүү журмаар боловсролын цахим мэдээллийн сан /цаашид "мэдээллийн сан" гэх/-г бүрдүүлэх, ажиллуулахтай холбогдсон харилцааг зохицуулна.

1.2. Цахим мэдээллийн санг бүрдүүлэх, ажиллуулах харилцаанд оролцогч мэдээллийн эзэн нь Хүний хувийн мэдээлэл хамгаалах тухай хуулийн 17 дугаар зүйлийн 17.1 дэх хэсэгт заасан үүргийг хүлээнэ.

1.3. Цахим мэдээллийн санг бүрдүүлэх, ажиллуулах харилцаанд оролцогч хүн, хуулийн этгээд нь Нийтийн мэдээллийн ил тод байдлын тухай хуулийн 35 дугаар зүйлийн 35.2 дахь хэсэгт заасан үүргийг хүлээнэ.

### ХОЁР. ХАМРАХ ХҮРЭЭ

2.1. Боловсролын асуудал эрхэлсэн төрийн захиргааны төв байгууллага /Цаашид "яам" гэх/, түүний харьяа байгууллага, боловсролын асуудал эрхэлсэн орон нутгийн байгууллага, бүх түвшний боловсролын сургалтын байгууллагад ашиглагдаж буй мэдээллийн систем хөгжүүлэгч хувь хүн, хуулийн этгээд /цаашид "систем хөгжүүлэгч" гэх/, мэдээллийн санг бүрдүүлэх, ажиллуулах чиг үүрэг бүхий албан тушаалтан, холбогдох хууль тогтоомжид заасан бусад байгууллага энэхүү журмыг мөрдөнө.

### ГУРАВ. МЭДЭЭЛЛИЙН САН БҮРДҮҮЛЭЛТ, АШИГЛАЛТ

3.1. Мэдээллийн сан Боловсролын ерөнхий хуулийн 43.3-т заасан мэдээллээс бүрдэнэ.

3.2. Мэдээллийн санг "Журам батлах тухай" Монгол Улсын Засгийн газрын 2023 оны 465 дугаар тогтоолоор батлагдсан "Боловсролын цахим мэдээллийн сангийн систем, техник технологи, программ хангамжийн ерөнхий шаардлага болон төрийн цахим мэдээллийн сан хариуцсан байгууллагатай мэдээлэл солилцох журам"-д заасан мэдээллийн систем, дэд систем болон систем хөгжүүлэгчийн хөгжүүлсэн боловсролын сургалтын байгууллагад ашиглагдаж байгаа мэдээллийн систем, программ хангамжаар дамжуулан бүрдүүлнэ.

3.3. Боловсролын сургалтын байгууллага нь байгууллагын удирдлагын болон сургалтын зориулалтаар мэдээллийн систем, программ хангамж ашиглаж байгаа тохиолдолд Засгийн газрын 2023 оны "Журам батлах тухай" 432 дугаар тогтоолоор батлагдсан "Боловсролын цахим мэдээллийн сангийн бүртгэл, мэдээлэл солилцох, хадгалах, хамгаалах, баяжуулах, ашиглах журам"-д заасан



мэдээлэл солилцооны системээр дамжуулан мэдээлэл солилцоно.

3.4. Систем хөгжүүлэгч нь яамтай мэдээлэл солилцох гэрээ байгуулах хүсэлт ирүүлэхдээ доор дурдсан баримт бичгийг бүрдүүлнэ:

3.4.1. албан хүсэлт;

3.4.2. улсын бүртгэлийн гэрчилгээний хуулбар;

3.4.3. сервис үйлчилгээний нэр /өгөх, авах/;

3.4.4. холбоо барих мэдээлэл.

3.5. Яам мэдээлэл солилцох гэрээ байгуулах хүсэлтийг хүлээн авч энэхүү журмын 3.3-т заасан журмын дагуу систем хөгжүүлэгчтэй мэдээлэл солилцох гэрээ байгуулна.

3.6. Боловсролын мэдээллийн технологийн төв нь систем хөгжүүлэгчийн боловсруулсан мэдээллийн систем, программ хангамж энэхүү журмын 3.4.3-т заасан сервис үйлчилгээг ажиллуулах тохиолдолд систем хөгжүүлэгчид зөвхөн нэг токен олгож, мэдээлэл солилцоно.

3.7. Яамтай энэхүү журмын 3.5-т заасан мэдээлэл солилцох гэрээг байгуулсан систем хөгжүүлэгч нь Монгол Улсын Кибер аюулгүй байдлын тухай хууль, Хүний хувийн мэдээлэл хамгаалах тухай хууль, Нийтийн мэдээллийн ил тод байдлын тухай хууль, Цахим гарын үсгийн тухай хууль болон бусад холбогдох хууль, тогтоомжийг мөрдөж ажиллана.

3.8. Яамны салбарын хяналтын асуудал хариуцсан нэгж боловсролын цахим мэдээллийн сан бүрдүүлэх, ажиллуулах үйл ажиллагаанд хяналт тавина.

3.9. Боловсролын ерөнхий хуулийн 34.1, 34.2-т заасан Удирдах зөвлөл, Сургууль, цэцэрлэгийн зөвлөл нь систем хөгжүүлэгчийн боловсруулсан системийг тухайн сургалтын байгууллагад ашиглах эсэхийг шийдвэрлэж, систем хөгжүүлэгчтэй гэрээ байгуулах, хяналт тавих, гэрээг цуцлах асуудлыг шийдвэрлэнэ.

3.10. Боловсролын мэдээллийн технологийн төв нь энэхүү журмын 3.9-д заасан систем хөгжүүлэгч болон боловсролын сургалтын байгууллага хооронд гэрээ байгуулах, хяналт тавих, гэрээг цуцалсныг бүртгэх боломж бүхий цахим системтэй байна.

3.11. Боловсролын сургалтын байгууллага энэхүү журмын 3.9-д заасан гэрээг байгуулахдаа ашиглалтын зардлыг доор дурдсан эх үүсвэрээс санхүүжүүлнэ. Үүнд:

3.11.1. боловсролын сургалтын байгууллагын нэг суралцагчид ногдох хувьсах зардлын цахим хэрэглээний зардал;

3.11.2. эцэг, эх, асран хамгаалагч, харгалзан дэмжигчээс сайн дурын үндсэн дээр өгөх хандив;

3.11.3. хуульд заасан бусад орлогоос.

3.12. Систем хөгжүүлэгч нь Монгол Улсын Өрсөлдөөний тухай хууль, Хэрэглэгчийн эрхийг хамгаалах тухай хуулийг мөрдөнө.

3.13. Систем хөгжүүлэгч нь энэхүү журмын 3.5-т заасан гэрээний дагуу боловсролын сургалтын байгууллагын анхан шатны бүртгэлийн мэдээллийг бодит

цагийн горимоор энэхүү журмын 3.3-т заасан мэдээлэл солилцооны системд хүргүүлнэ.

3.14. Яам нь энэхүү журмын 3.3-т заасан журмын дагуу сервис хөгжүүлэлтийн төлөвлөлтийг тухайн сервисийг ашиглахаас 3 сарын өмнө батлах бөгөөд Боловсролын мэдээллийн технологийн төв тухайн сервисийг ашиглахаас 1 сарын өмнө туршилтын хувилбарыг гаргана.

3.15. Боловсролын сургалтын байгууллага нь "Журам батлах тухай" Монгол Улсын Засгийн газрын 2023 оны 465 дугаар тогтоолоор батлагдсан "Боловсролын цахим мэдээллийн сангийн систем, техник технологи, программ хангамжийн ерөнхий шаардлага болон төрийн цахим мэдээллийн сан хариуцсан байгууллагатай мэдээлэл солилцох журам"-д заасан мэдээллийн системийг ашиглахгүй, систем хөгжүүлэгчийн боловсруулсан мэдээллийн системийг ашиглана.

3.16. Энэхүү журмын 3.3-т заасан мэдээлэл солилцооны систем нь Монгол Улсад хэрэглэгдэж байгаа бүх төрлийн төлбөр, тооцооны системийг дэмждэг байна.

#### ДӨРӨВ. ХЯНАЛТ, ХАРИУЦЛАГА

4.1. Мэдээллийн сангийн зөрүүтэй, алдаатай, хамралт дутуу бүрдүүлэлтээс үүсэх аливаа асуудлыг тухайн бүртгэсэн, нэгтгэсэн, хянасан мэдээлэл хариуцагч байгууллагын буруутай ажилтан, албан тушаалтан, систем хөгжүүлэгч хариуцаж, холбогдох хуулийн дагуу хариуцлага хүлээнэ.

4.2. Яамтай мэдээлэл солилцох гэрээ байгуулсан систем хөгжүүлэгч нь энэхүү журмын 3.8-д заасан нэгжээс гарсан шийдвэрийг биелүүлээгүй тохиолдолд мэдээлэл солилцох гэрээг цуцалж, холбогдох хуулийн дагуу хариуцлага хүлээлгэнэ.

4.3 Систем хөгжүүлэгч энэхүү журмын 4.1-т заасан алдаа гаргасан тохиолдолд Боловсролын мэдээллийн технологийн төв нотлох баримтыг яаманд хүргүүлнэ.

4.4. Энэхүү журмын 3.2-т заасан мэдээллийн систем болон энэхүү журмын 3.3-т заасан мэдээлэл солилцооны систем, сервис хөгжүүлэлтээс шалтгаалж мэдээллийн санг мэдээллийн алдагдалд оруулсан бол Боловсролын мэдээллийн технологийн төвд холбогдох хуулийн дагуу хариуцлага хүлээлгэнэ.

4.5. Боловсролын сургалтын байгууллагын удирдлага нь Боловсролын ерөнхий хуулийн 34.1, 34.2-т заасан Удирдах зөвлөл, Сургууль, цэцэрлэгийн зөвлөлийн шийдвэргүйгээр систем хөгжүүлэгчтэй бие даан гэрээ байгуулах, байгуулагдсан гэрээг үндэслэлгүй цуцлах, гэрээний үүргийг мөрдөөгүйгээс шалтгаалж мэдээллийн санг мэдээллийн алдагдалд оруулсан, систем хөгжүүлэгч талыг төлбөрийн алдагдалд оруулсан бол түүнээс үүдэн гарах хохирлыг удирдлага өөрөө хариуцах ба холбогдох хууль тогтоомжийн дагуу хариуцлага хүлээлгэнэ.